



Mbingu Zauhubiri Utukufu

Mbingu zauhubiri utukufu wa Mungu, Na anga laitangaza kazi ya mikono yake.—Zaburi 19:1.

Mwumbaji ametoa ushahidi mwingi kwamba uwezo Wake hauna kikomo, kwamba Anaweza kuinua falme na kuangusha falme. Anashikilia ulimwengu kwa neno la nguvu Zake. Aliuumba usiku, akiangalia nyota zinazong'aa angani. Anaziita zote kwa majina. Mbingu zinatangaza utukufu wa Mungu, na anga linaonesha kazi Zake, likionesha kwa wanadamu kwamba dunia hii ndogo ni kama nukta tu katika uumbaji wa Mungu...

Wakazi wa dunia zisizoanguka wanatazama kwa huruma na kushutumu kiburi na hali ya kujijali ya mwanadamu. Wenye mali na heshima wa dunia siyo wao pekee wanaojikweza. Wengi wanaodai kumcha Mungu wanazungumzia hekima yao na nguvu zao. Wanatenda kana kwamba Mungu anawajibika kwao, kana kwamba Yeye hawezi kuendeleza kazi Yake bila msaada wao. Hebu hao watazame anga lenye nyota, na kwa heshima na kwa kupenda wajifunze kazi za ajabu za Mungu. Hebu wafikirie hekima aliyoionesha katika kudumisha mpangilio kamili katika ulimwengu mkubwa, na ukubwa mdogo alio nao mwanadamu wa kujivuna kwa mafanikio yake.

Kila kitu alichonacho mwanadamu—maisha, njia za kuishi, furaha, na baraka nyingine zisizohesabika zinazomjia siku kwa siku—zimetoka kwa Baba wa mbinguni. Mwanadamu ni mdeni kwa yote anayodai kwa kiburi kuwa mali yake. Mungu anatoa zawadi Zake za thamani, ili zitumike katika huduma Yake. Kila chembe ya utukufu wa mafanikio ya mwanadamu ni ya Mungu. Ni hekima Yake nyingi inayooneshwa katika kazi za wanadamu, na sifa ni Zake Yeye (Youth's Instructor, Aprili 4, 1905).

Hatimaye, malango ya mbinguni yatafunguliwa kuwapokea watoto wa Mungu, na kutoka kwa midomo ya Mfalme wa utukufu baraka itamwagika masikioni mwao kama muziki wa thamani, "Njoni, mliobarikiwa na Baba yangu, urithini ufalme mliowekewa tayari tangu kuumbwa ulimwengu" (Mathayo 25:34).

Kisha wale watakaokuwa wamekombolewa watakaribishwa nyumbani ambako Yesu anawaandalia. Huko washirika wao hawatakuwa waovu wa dunia, waongo, waabudu sanamu, wenye uchafu, na wasioamini; bali watashiriki na wale waliomshinda Shetani na kwa neema ya Mungu wamejenga tabia kamili. Kila mwenendo wa dhambi, kila kasoro, inayowatesa hapa duniani imeondolewa kwa damu ya Kristo, na utukufu na mwangaza wa utukufu Wake, ipitayo ung'avu wa jua, watakuwa wamepewa (Steps to Christ, 125, 126).